

Die grad linien heißt subtenſaſ corda, Sennen vnderzogne oder ſchnür / ſo mitten von diſer an den vmbkreiß ein perpendicular erhebt wirdt / ſo heißt die ſelb ſagitta, ein Pfeil oder Boltz.

20. Ein grade linien rürt ein Circkel / ſo die ſelb verlegt inn rührt vnd nit ſchneidet.

21. Sector Circuli, ein außſchnitt deß Circkels oder Circkelzann / iſt ein Figur begriffen von zweyen graden linien (ſo auff dem Centro ein winckel machen / vnd an den vmbkreiß langen) vnd den vmbkreiß zwüſchen beyden graden linien.

22. Inn oder vmbſchribne Figuren ſeyn die / ſo die ſeiten der inn oder vmbſchribnen Figur / der andern Figur alle winckelrührendt.

23. Figura Regularis, Regulirte Figure ſeyn die jenigen / ſo alle winckel gleich haben / vnd alle ſeiten auch ein ander gleich ſeyn.

24. Rechtliniſche Figur iſt die / ſo mit graden linien beſchloſſen iſt.

25. Die ſo mit drey linien beſchloſſen wird drey ſeitige Figur genennt: die mit vieren vierſeitige Figur: die mit mehr ſeiten beſchloſſen / mehr ſeitige.

26. Triangulus æquilaterus, gleichſichtiger Triangel / iſt der ſo drey gleiche ſeiten hat.


27. Triangulus Iſoſceles, iſt der ſo allein zwo gleich ſeiten hat.

28. Triangulum Scalenum, iſt ein Triangel von dreyen vngleichen ſeiten.

29. Triangulum Rectangulum, ein rechtwinckleter / oder winckelrechter Triangel / iſt der ſo ein rechter winckel hat.

30. Triangulum obtuſangulum / ein weit winckleter Triangel iſt der ſo ein weiten winckel hat.

31. Triangulum acutangulum, ein ſcharpff oder ſpizwinckleter Triangel / iſt der ſo alle winckel ſcharpff oder ſpiz hat.



32. Quadratum, ein vierung / iſt diejenige welche vier rechte winckel hat / vnd vier gleiche ſeiten.